


Rs. 4.50

# KRISTIAN THALAI

Vol. II, Issue No. 2



April 2010



## Nangma thu thu ni zawk rawh se

National Ecumenical Youth Assembly 2010

Ephesi 2:10 ■  
Eng kan ti bik nge le!? ■  
Mangtha KTP ■

KTP ICON PU NGOKAMA

Blood Test

# HRISELNA

KTP General Conference 2010



*Kristian Thalai Pawl chanchinbu thla tin chhuak*

# *Kristian Thalai*

**Vol. II ■ Issue No. 2**

**APRIL 2010**

*(Independent Monthly)*

Editor	: Upa C. Zosangliana	9436360723
Joint Editors:	Robert Lalrempuia	9436142432
	Lalthlengliana Pachuau	9436144903
	H. Liantluanga	9436361167
Manager	: Lalmuanpuia	9436142398
		2335821 (KTP Office)
A lak man	: Kum khatah —	Rs. 50.00
	Copy khat —	Rs. 4.50

*Thu chhuah tûr nei chuan Editor, Kristian Thalai, Synod Office-ah tharwn tûr a ni a; a la duh chuan Manager hnênah a man pêk lâwk a ngai.*

*E-Mail: [kristianthalai@yahoo.com](mailto:kristianthalai@yahoo.com)*

**1970-a chhuah tan ■ Kum 40-naa vawi 4-na ■ Chhuah tawh zat : 379**

## **A CHHUNGA THU AWM**

1.	Nangma thu thu ni zawk rawh se .....	5
2.	Ephesi 2:10 .....	8
3.	Eng kan ti bik nge le!? .....	11
4.	Mangtha KTP .....	13
5.	Hruaitu kal chhuakte kam chhuak .....	15
6.	KTP General Conference 2010 .....	21
7.	National Ecumenical Youth Assembly 2010 .....	27

---

<b>Editorial</b> .....	<b>3</b>	<b>Hriselna</b> .....	<b>31</b>
<b>Hlimthla</b> .....	<b>4</b>	<b>Hriatzauna</b> .....	<b>33</b>
<b>Hringlang tlang</b> .....	<b>26</b>	<b>Keimahni</b> .....	<b>34</b>



## KTP hi i ngaihlu ang u

PATHIAN KHAWNGAIHNA leh venna azarah  
KTP huang chhunga rawngbawlna chu mit del buh  
den chawrh chawrh chang aom thin bawk mah se, mawi takin hlen ve thei ta  
niin ka inhria a, ka lawm khawp mai. Heti anga rawngbawlna pawimawh  
tak hi mahni châk avang leh phu reng vanga thawh chi a ni lo tih erawh chu  
hmu Chiang hle-in ka inhre thung. Kum 14 atanga kum 40 thlengte pual,  
KTP-ah hian thangkhat lian zet chu phak ang tawk tawkin ka tel ve a,  
inchhirna sawi tur reng reng ka nei lo, inchhir ahnekin nih phak loh leh tawn  
phak loh tur min tawntirtu a ni zawk, phu loh malsawmna nen.

KTP-a tel hi a nuam a, a finthlak a, tisa leh thlarau puitlinna kawnga  
mihring timihringtu a ni. KTP member tinte hi KTP hming a chhiatin kan  
rilru na pha se la, a hmingthat pawhin kan rilru hlim pha teh se. Chuti ang  
rilru kan pu lo a nih chuan a neitu ni lovin khaw dang sial kan ni tihna a ni  
a, NGO ang maiin kan ngai tihna a ni ang.

KTP hi eng nge a nih Chiang mang lo KTP member kan nih loh nan inveng  
fimkhur ila, a thil tum tihlawhtling tur zawngin rilru kan sen theuh a  
pawimawh. KTP rawngbawlna leh programme-a kan kal chuan kan  
chhungte ngaih a tha a, hetiang a nih mek lai hian mi thenkhat mahni kal  
chhan pawh hre mang lova sapatat vak an aom thin, a mawi lo a ni.

KTP hi Pathian rawngbawlna a ni a, mahni duh dan dana aomna tur a ni  
lo. Mahni hna lam aiin Pathian rawngbawlna kan dah pawimawh zel chuan  
kan Kohhran hian chhiat hun a nei lo ang a, kan thachhangdaltute nunah  
pawh thil tha tak kan tuh dawn ang a, inpekna kawngah pawh hma tha takin  
kan sialsak a lo ni reng mai. Mi dang tana malsawmna ni tur kan ni.

Indonaah Captain ber a tlanchhiat chuan a thuihhruaite chuan hma lam pan  
zel fulah an ngai lo a, an tlawm nge nge thin. Kristian tihduhdahna hmuna  
an tihduhdah duh loh kristian kan nih loh nan inveng fimkhur ang u. Lawng  
hi lawngchawhlnaa a aom hian a him em em a; mahse, chu chu lawng siam  
chhan a ni si lo.

KTP member-te chu mi aiin a thawk nasa tur a ni



- Kum 2010 KṚP khawmpuia kal tumte tana thurawn ni awm tak, Kristian Ṭhalai March 2010 Editorial-ah zanin 15.3.10 hian kan hmu thei chauh a, va ṭangkai hman lo ve le, tihchhuah hma theih dan a awm em? Nge a rawn lamtute an muang ṭhin zawk? Nge in thawn chhuak har? —9856887138

*Ṭangkai hun te pawh a la awm mai thei tih chauh a ni e, Synod Press lamin harsatna lian tak an tawk a; chuvang chu a ni ber e. Conference hmaa chhuak hman ngei tura buatsaih chu kan nih kha maw le. Hetianga a chhuak tlai tih zawhna kan dawng hi Kristian Ṭhalai chanchinbu min hlutsakzia lantirtu ṭha tak a ni a, min ṭiṭang hle, ṭan ṭlan a ngai a ni, Editorial Board-in mawh a phurh thui ber lain agent ṭhenkhatte pawh hian kan lam har ve deuh bawk chang a awm a nia.*

- March thla chhuak a ngaihnaawmin a ṭha, avaiin. KṚP member ka ni tawh lo nain ka lo chhiar ziah, in kal zelna turah duhsakna ka hlan a che u. —V. Zonunpari, Republic Vengthlang  
*Kan lawm e.*

- Pu Editor, thuziak chhiar manhla tak tak min chhawp chhuahsak ṭhin avangin ka lawm e. Kristian Ṭhalai February issue-a 'Kristian nun – Thianghlimna' tih thupui hmanga Mazira, W. Phaileng thuziakah khan 2nd para-a Pathianin a mihring siam, Eden huana a dahte kha mipat hmeichhiatna (sex) hman a khap thu a rawn ziah kha ka la hriat ngai loh thil a ni a, Bible-ah hian a lo inziak reng em ni? Hriat chian ka va duh ve. —Maruata  
*Khap thu hi chu Bible-ah a inziak lo ang, sex lama thianghlim a duh luatah a va tih luattuk pawh a ni mai thei, a ziaktu hi i lo zawt chiang mai dawn em ni ang. Mi mal theology hian mi dang a tibuai chawka nia.*

## GOOD FRIDAY SERMON

## Nangma thu thu ni zâwk rawh se

Mt. 26:36–46; Mk. 14:32–42; Lk. 22:39–46

REV. K. LALPIANGTHARA, LEADER, CKTP

**G**ETHSEMANE huana Lal Isua ṭawngṭai thu hi Matthaia, Marka leh Luka te hian an ziaḵ theuh a. An ziah dan erawh chu a inang vek lem lo a. *'Nimahsela, keia thu ni lovin nangma thu thu ni zawḵ rawh se'* tih hi Marka leh Lukan a inang chiahin an ziaḵ a. Matthaia chuan *'keia thu'* ti lovin *'keima thu'* tiin a ziaḵ a, hei chauh hi helaiah hi chuan a inan lohna a ni. Tin, Matthaia hian Marka leh Lukan an ziah chian fak loh Chiang taka a ziah chu *'...a vawi thumnaah a thu sawi ngai sawiin a ṭawngṭai leh a'* (26:44) tih hi a ni a. Tin, Matthaia leh Marka ten an ziah loh Luka chauhvin a tarlan chu, *"...a thlan thi far lian tak angin leiah a far a'* (22:44) tih hi a ni.

Lal Isua hi **Pathian tak** a nih rualin *mihring tak* a ni bawḵ a. Mihringte awmdan zawng zawng a ṭawmpui vek a. Zawlnei Isaia pawhin, *'...lungngaihna nei mi leh*

*natna hre mi'* (53:3) tiin a lo sawi daih tawh a ni. Mihring ve bawḵ a nih avangin a no in tur kha a huphurh tak zet zet a, a pumpelh theih dan awm se a ti ngawih ngawih a ni. A lungngaih luattuk avangin a thlan pawh thi far lian tak angin a far hial a nih kha! Chuti anga lungngaihna chhumpuiin a bawm lai pawhin, *"...nimahsela, keima thu ni lovin, nangma thu thu ni zawḵ rawh se,"* a la ti thei fan a, a ropui hle mai.

Marin Isua a pai tur thu Gabrielan a hrilh ṭum khan Mari thinlung kha hlauhlawpin a awm a. Josefa nen an inhual tawh avangin mi dang laka nau a lo pai chuan den hlum mai theih dinhmuna ding a ni bawḵ si. Engkim huamin, *"Ngai teh, Lalpa bawih nu ka ni, i thu ang zelin ka chungah thleng rawh se,"* a lo ti tawh a (Lk. 1:38). Kum 30 chuang zet a vei hnuah a Fapa-in kraws thihna

hmachhawnnin Pa Pathian hnenah *'nangma thu thu ni zawok rawoh se'* a rawn ti ve thunga. Pathian thil tum tihhlawhtlina a awm theih nan an nufain I THU NI SE tiin Lalpa remruatna chu an AMEN ve ve a ni.

Lal Isua thlan thi far lian tak anga a far thu Lukan a sawi hi mi thiamte pawhin thil awm thei niin an sawi. Lungngaihna vawrtawpah chuan thlan bawm bula thisen zam te tak tē tē hi a chat thei a, chu chu thlan nen inchawhpawlhin thi far angin a lo chhuak thei niin an sawi. Mi sualte kuta pek a nih hma hauh pawhin kan tan a thisen a lo far tawh chu Charles H. Gabriel-a chuan chiang taka hmuin *'a tana lungngai a ni lo, ka tan a thisen a far'* tiin hlain a lo chham chuak hial a. Olive hriak an sawr chhuah җhinna Gethsemane huanah ngei chuan Lal Isua lungngaihna hriak chu sawr chhuahin a lo awm ve ta a ni.

Lal Isuaah hian *'I thu ni se'* tih theihna nun hi a langsar hle a. Samari hmeichhia nena an inbiaknaah khan, *"Mi tirtu duh zawong tih leh, a hna thawh zawh tur hi ka chaw a ni,"* a ti a (Joh. 4:34). Ama thua awm a tum loh thu sawiin, *"Keima thu thuin awm ka tum lo a, mi tirtu thu thu zawokin awm*

*ka tum җhin,"* a tih thu a hnu lawkah a sawi leh a (Joh. 5:30). Hmun dangah, *"Mahni duh zawong ti turin van aҗanga lo chhuok ka ni lo a, mi tirtu duh zawong ti tura lo chhuok ka ni zawok e,"* a ti leh bawk (Joh. 6:38). *'I thu ni se'* tih theihna nun Lal Isuan a neih hi Tirkkoh Paula pawhin a hmuh chian em avangin, *"Tin, mihring anga lo awmin, a inngaitlawm a, thi khawp hiala thu zawmin a lo awm ta a, krawsa thihna ngei chu,"* tiin a lo au chhuahpui ta hial a ni (Phil. 2:8). Helai thu aҗang hian ringtuten zir tur tam tak kan nei thei ang a. Tawi tē tēin heti ang hian han tarlang thliah thliah ila –

**1** Lal Isua chuan amah aiin a Pa Pathian leh a rawngbawl hna kha a ngaipawimawh zawka ni tih a chiang hle a, a nuna zir tur ropui tak tak kan neihte zinga pawimawh tak a ni. Keini chuan mahni kan inngaipawimawhin kan inhmangaih ber җhin. Kan rawngbawl naah pawh hian kan Pathian leh rawngbawl na hna min kawltir hi i dah pawimawh hmasa ve ngam ang u.

**2** Lal sua chuan a Pa thu a ngaichang a, a thu a awih em em. Kan tun lai hunah hian hringtu nu leh pate zah lo leh an thu ngaichang reng reng lo, hlahu

ahneka vau khur khur ðhin kan tam ta hle mai. ðhalaite kan dam rei tak loh em emna chhan pawh hi nu leh pate thu awihna kan tlakchham tak em em vang pawh a ni mai thei asin.

**3** Pahnihna a ni thiam em em hi Lal Isua nuna kan zir tur pawimawh lutuk a ni. Pakhatna nih thiam zir tur kan nih rualin pahnihna nih thiam hi a pawimawh hle. Engkima langsar ber emaw, lu ber emaw nih loh chuan vui leh tihtauh ching a awm theih. *Political party*-ah te leh *association*-ah te, *society* lamah leh thil dangah lansarh loh avanga vui mai a awl hle ðhin. Lal Isua angin a ðul hun apiangah pahnihna i ni ngam ve ang u.

**4** Apa hnena '*nanhma thu thu ni zawk rawh se'* a tih theihna hi khawvel a hnehna leh amah ngei pawh chawimawia a awm theihna chhan a ni. Hei hian inngaih-tlawmna hi khawvel hnehna

hmanraw ðha ber a nihzia leh mahni ngei pawh chawisana kan awm theihna a ni tih min zirtir Chiang hle awm e.

**5** Harsatna leh lungngaihna han tawh chang hian '*nanhma thu thu ni zawk rawh se'* tih a harsa fo ðhin. Kan duhna tihlawhtling tur zawngin Pathian kan kar a, lung bang sut ang tlat a ni ðhin. '*I thu ni se'* ti zawnga kan ðawng ðai chuan Aman min hneh sak ðhin a ni. A thu ang zela awm tura a hnena kan intukluh hi kan tih tur pawimawh tak a ni.

**6** Rawngbawlhna Lalpan min pekte hi harsatna tam tak karah hlen chhuah a ngai ðhin a. Kan tawrh lohna tura kan tawrh te, harsatna kan tawh phah hial te, kan tlakchham phah changte pawh a lo thleng ang. Chung hunachte pawh '*I thu ang zelin ka chungah thleng rawh se'* ti zel thei turin kan puan ven i sawi chhing ang u. AMEN ♦



■ Kum 2008-2010 chhung Pathian khawngaihna avangin Kristian ðhalai chanchinbu thuang takin kan enkawt thei a, kan lawm em em a, enkawltu thar turte duhsakna kan hlan e. Pasa ðha pakhat thlan lunga inziak, '**Sakhi 100 a kap a, a kah aiin a kah loh an tam zawk'** an tih ang deuhin lawm thu kan sawi seng lo.

– Editorial Board 2008-2010

# EPHESI 2:10

LALFAKZELA, THINGLIAN

**A**DAMA leh Evi khan Pathian thupek kha zawmin, ei loh tur a tih kha ei ta lo se la, mihringte hian tunah hian eng dinhmun nge kan luaha i rin. Tun ai hian kan ropui zawkin kan changkang zawk ang em? Tun ai hian kan changkang zawkin kan ropui zawkin ka ring ṭhin. Kan changkan dan pawh a thianghlim zawk ang a, he kan chenna khawvel pawh hi anchhe dawng khawvel a ni lo tur. I ṭha bik, i chhe bik, he nu/pa hi ka ei lo, a *over* bawk si intih intihte pawh hi a ngai lo tur a nia. Evi, a va pawi ve!

Tih tak takah chuan, kan thlahtu hmasate pawh khan Pathian thupek kha lo bawhchhe lo tuantling pawh ni se la, tunlai mite hian kan bawhchhe tho tho chu a nih hi. An bawhchhiat avanga an tuarna te, Lalpan anchhia a lawhziate pawh kan hre vek. Chuti chung pawh chuan, han ngaihtuah teh, ei loh tur pawh

kan ei ru nasa a, in loh tur a tih phe chu in nasa tak kan ni. Tih loh tur hlei hlei hi a nia kan tih châk ni. Mahni ta pawh ni lo, mi dang ta kher kher hi kan tih duh zawng emaw ni lehngal ni. Mosia khan dan tam tak pawh ni lo, dan sawm lek, Pathian hnena mi a la. Chu pawh chu kan zawm peih seng lo. A aiah Pathianin a fapate zinga a hmelchhe ber pawh ni lo, a fapa neihchhun, a lawm em em minrawn pe a. Mahni khum laizawlah pawh thi lovin, thih dan azawnga thih dan hrehawm ber leh hmuhsitawm berin kraws lerah a thi a. Chumi zarah chuan chhandam kan lo ni ta a ni. A va ropui em! Amaherawhchu, chhandamte awmdan leh nun danah hian Pathian lung a awi ang em?

Mizorama mihring cheng zawng zawng zingah hian a tam zawk chu KṬP member, rawngbawl tura chhandamte kan



ni (mi dang an ni lo tihna ni lovin). Chuvangin tuna kan awmdan leh kan nun dan tam tak hi chu thlak danglam a ngai a ni. Rilru leh ngaihtuahna zawng zawng sengin han dawn ve mah teh. Inngaihna suala tlu te, ruihhlo bawihha tang mek te, sum leh pai dik lo taka hmangtu te, zu hmun sa hmuna cheng te, Lalpa zara kan ro chan fanau malsawmna dik lo taka tichingpentu (titlatu) te leh Kohhran thununna tawkmekte hi KṯP member duh lai te an ni asin! A va lungchhiatthlak em! Kan tana hmun siama kal mek Lal Isua hian a hmun siamte zovin lo kal leh ta

---

**NAUPANG pakhat chuan,  
“KṯP-a inhman ve theih tawh  
ka chak,” a ti vawng vawng  
a... ka’n ngaihtuah Chiang a,  
ka rilru a tibuai map mai!**

---

mai se la... sawi thui lo ang. Thil tuma Krista Chanchin ṯha puan darh neitute hi kan thawh a ngai, kan harh a hun... a tlai lu ta an tih hma hian.

Kan ram, kan khawtlang, kan Kohhran dinhmun kan hria. A chhe lai siam ṯha turin Lalpan min duh. Rawngbawlina changkang tak tak neih a, thlarau nun changkang si lo nih te hi a hlauhawm. Kan ram tlu chhe mek

tung ding leh turin ka KṯP member-pui duh takte u, ṯawngṯaina nen i thawk ang u. Khawvel changkannain ṯhalaite min ei chhe mek. Kan ramah Pathian thinurna a thleng dawn an ti, a dik ang. Kan sualna leh kan bawhchhiatnate Pathian hnena kan inlamlet loh chuan kan hmabak a ko hle ang. II Chro.7:14-ah chuan heti hian kan hmu, *ka hming pu ka mite chuan inngaitlawma an ṯawngṯai a, min zawn a, an awmdan sualte an harwisian chuan van aṯangin ka lo ngaihtla ang a, an sualte ka ngaidam ang a, an ram chu ka tidam leh ang, tiin.*

Kan venga naupang pakhat chuan, “KṯP-a inhman ve theih tawh ka chak e,” a ti vawng vawng mai a, KṯP min ngai ropui awm hle mai ka ti rilru. Amaherawhchu, ka’n ngaihtuah Chiang a, ka rilru a tibuai map mai. KṯP member te hi eng ngaihin nge min ngaih? Eng vanga KṯP-a inhman ve tawh chak nge a nih? Zaipawl vang em ni? Nge, fellowship-a zai tuarh tuarh? General Conference nge hnatlan? KṯP inkhawm vang a ni ang. Ni e, mi dangte hian kan zinga tel ve te, kan bula khawsak vete hi an chak tur a ni. He naupang thusawi hi hruaitute mai pawh ni lo, member active lem lote tan pawha dawn sawn a nawm awm ve

teh reng nen, ka ngaihtuahna zu tithui teh hrep a.

Aw le, KṚP-a ka member-pui duh tak te u, Pathianin min siam chhan ang ngei hian thil ṭha tih hi i ning lo ang u. Kohhranah ṭhahnem ngai ila, Kohhran kut ke ni turin inbuatsaih teh ang u khai. KṚP te hian sawi chhiat leh hmuhsit kan hlawh ṭhin. Chutiang karah pawh chuan hma lam pana kal zel tur kan ni.

Kan ram hian chhantu a ngai a, tungdingtu a mamawh asin. I ṭhat lai hun, i vanglai hian eng kawng ngei zawh dawn le? He kan Zoram tlu chhe mek tungding leh tur hian mi fing leh remhriaten an daih zo lo. Kan kovah Lalpan a nghat ta. KṚP member te hian tih tak zeta Lalpa kan auh chuan min chhang ngeu ang tih hi i ringhlel lo ang u. Amaherawh-chu hei hi kan hre reng dawn nia – Ephesi 2:10 ♦



■ *Vawi khat Johns Hopkins University-a Dr. Howard Kelley-a ram chhuak chu kein a tum aia thui a kal a, a tui a hal ta hle mai a. Farm pakhata in a hmuuh chu a va pan chawot a, hmeichhe naupang hian a lo chhawon a. A nu leh pate an awm loh thu a lo hrilh a. Doctor chuan tui in tur a dil a, hmeichhe naupang chuan tui in tur an neih loh thu hrilhin bawngnhnute in tur a lo pe a. A duh tawok a intir hnu chuan a kal leh ta a. Kar hnih khat hnuah chu doctor chuan hmeichhe naupang pakhat hi inzaina dawhkawonah a zai a, bawngnhnute intirtu hmeichhe naupang ngei mai kha a ni tih a hai lo.*

*Hmeichhe naupang chhungten damdawwi in awm man leh zaina man te an han hmu chu an sum neihin a tlin lo tih an hriat chian avangin an mangang hman kher mai; uluk takin an chhiar thla zar zara a tawpa an thil hmuuh chu mak an ti kher asin! 'Bawngnhnute no hnihin heng bill zawng zawng hi a tlak fel vek tawh e' tih a lo inziak kalh mai!*

■ *Mi thiam pakhat hian Krista ringtu hmeichhe naupang hnenah, "Mami, i va han khawngaihthlak tak em! Krista hming pu hi an awm ṭeuh a, i rin ber pawh chu i hre tak si lova le!" a ti a. Hmeichhe naupang chuan, "Ka hria alawm. Kros-a an khenbeh, thlana an phum, thlan aṭanga tho leh ta kha Krista ka rina chu a ni," tiin a chhang a.*

# Eng kan ti bik nge le!?

Z.L. DINPUIA, LEADER, VENGHNUAI BRANCH

**E**NG KAN TI bik nge ni le!? Miten an duh duh tia khawvel hi hlim taka chena hun an hman laiin kan buai em em reng bik a. Zawng lai te kan la ni ve a, ngaih zawng te pawh thlahlel ve hle mah ila, 'kei aia ngaih pawimawh i ngah lutuk' min tih hlak hlak pawh ngaipawimawh thei lovin committee, hnatlang, inkhawm leh fellowship tein kan hun kan hmang zo a. Chuta hun awl la awm chhun chu *do so doh doh...* tiin, zaipawl hla zirin zankhaw tairek thlengin kan bu nghut nghut mai a. In chhungkhurah pawh chhungkaw hna ÷ul pawimawh thawk hman mang lo khawpin kan vir buai a, **atkhatchu kan cheng a ni deuh ber alawm maw ni le?**

Nula rim hman lek lovin kan vir buai a. Nula tan lah inleng neih zante hian KṚP hnatlan a ÷ul loh leh hla zir a lo ngai a. Lo chiau-au hman lo ta na na na chu leng dang min hawisan a. Zei loh vang ni

miah lovin KṚP-a inhmang chu an senior duh an tih te hi a dikna chen a awm thei rum rum mai. A ÷awng thei nazawng lah hian 'nupui pasal nei tawh, i leng tar mai dawn' min ti thla zen a. Eng kan ti bik nge le!? Mi dang nun dan ang hian nung ve ila, chan lo leh tuar lo tawkin awm ila, hetiang kan ni bik lo ang ti chung a rawngbawlna hawisan rih maite a chakawm thei hial mai ÷hin.

Chhun lamah mahni eizawna hna kan thawk a. Kohhrana inhma chuan ÷ul pawimawh eng eng emaw a lo awm a. Rawngbawlpuite hmai zah avang tal pawhin phat reng bik ni suh. Haw hma deuh a ÷ul chang a lo awm a, chhuahvah zawk a ÷ul ni a awm bawk a. Branch leh Kohhran aiawha kal chhuah a ÷ul hun te a lo awm rawl nen. Thawhpuiten KṚP/Kohhrana inhmangho chu hnathawh hun laia chhuah bo an hrat tiin min lo sel leh a. Lu a hai duh teh e!

Nupuiten, "Paa, i chhuak reng mai, thenawmpa hi en teh, chhungkua a awp lum bik asin. Naupangho hi lehkha zirtir an ngai a nia, zanin chauh chu chhuak lo mai teh," an han tih te hian sawi tur a vang duh teh e. Nupui fanau neih tawha KṚP-a la tel chu, thian tam zawk lah nula tlangvalan la nia, kan harsatna min hriatthiampui tak tak si lo. Rawngbawlpuite zah vangin thulh fo bik nuam si lo, nupuite lo phun ve reng mai baw si karah, nakum chu ka chawl tawh mai dawn em ni ang tih rum rum a awl mai thin.

Mi dang mamawh ang kan mamawh ve tho a; mahse hnathawhnaa level-puite kan phak lo tlat mai thin te hmuh hian tha a na lek lek thin. Hnathawh inang rau rau, kan in leh lo te, fate

sikul kan kaitirna te a inthlau thin em mai. Sum thianghlim lo an dawn leh an siam dan zawng zawngte kan hre ve vek a, kan ti thiam ve tho. Eng kan ti bik nge le!?

A chhan chu hei hi a ni tih kan hria. Thihna ata nunna min petu leh min chhandamtu Lal Isua hnung an zui avang leh Pathian kan thina avangin mite tih ang chu kan ti ve thei lo tih hi. Khawvel mite chu eng ang pawhin lo nung se, lo ei ru se, khawvelah hian nuam lo chen mah se la, keini zawng Van khua leh tui kan nih avangin (Phil.3:20) kan ti ve dawn lo. Chhungkuaah, tlangvalnaah, nulatnaah, hnathawhnaah, *adt.* Lal Isua kraws kan pu zel ang a, kan chhuang ber fo zel ang. Lalpan kan mamawh dik tak zawk chu min pe zel ang tih kan hre si a ♦



■ *George Nixon Briggs-a Massachusetts Governor a nih laiin a thiante pathumin ram thianghlim an tlawh a, Golgotha tlang panga an lawn chhoh laiin tiang atan thing pakhat an sat a. Chu tiang chu America-ah an hawn thleng a, Governor chu an pe a. "Kalvany tlanga kan din lai chuan kan rawn hre reng che asin," an ti hlut a. Ani chuan an tiang pek chu lawm takin a dawng a, an hnenah, "Thiante u, chutiang hmun atanga min rawn hre chhuak chu lawmawm ka ti hle mai, nimahsela chu hmuna min hre rengtu mi pakhat, Kross-a min tuarsaktu chungka ka lawmna chu a nasa zawk daih tih hi sawi ta ila in ngai haw lo vang chu maw," a ti daih.*

# Mangtha, KTP

C. VALA, J-5, ZONUAM

**K**AN VANG lai ni te hi a rei lo vang, he khawvela kan cham chhung hian' tia tui takin, meng phal mang lova kan sak chhungin a dikzia ka lo hre ve mek chu lo ni rengin. Kan KTP dawn chauh emaw tih laiin, Inkaihhraina Dan Bu fel tak chuan min lo *bye bye* mek a lo ni a.

Member list-ah te lan ve a rem tawh lo. Mahse, kan chanchinbu **Kristian Thalai** lak a, chhiar ve hi neitu chan chan vena kawng khat niin ka hria a. In phal emaw? Ka intineitu viau dawn! A chhunga ka chen laiin thu han ziah ve te ka chak rualin, mi dang tih turah ka ngai a, mi thiamte thu leh hla hian ka lo inawi tlei em em thin.

Heti hian ka ngaihtuah ta a. Wawikhat pian manah, mi chawm leh hraia awm reng leh Samdala ang maia a tla nghah ngawt ai

chuan eng emaw tal tih ve ngei duhna ka nei a. A thupui tur vuah thiam a har hle mai a. A tawpah chuan **Mangtha KTP** tih hi a lo piang ta a ni. KTP a tanga hnawh chhuah ka nih ve mek lai hian a thupui hi ka thlang fuh viau turah ka ngai. Fuh tak maw!?

Kan hruaitu hmasaten member kumbi an lo thliah fel thlap mai hi a lo fuh. Vanglai hun tak mai Lalpa tan hman theih tura an lo ruahman hi Pathian remruat a ni. A thu hrimah, KTP-a over mekte leh over tawhte tan chuan an zinga awm ve hi nuam tiin, lo phur ve durh durh viau mah ila, mahni tan pawh nuam tih lohna ruk a awm a. Thalai viak tha leh nau zawkte chuan kan bula awm nuam an lo ti mang hlek lo. Kan lo awm ve run hian kan lo dip a.

Fellowship-ah te pawh han tel ve ila. Kan hla sak tui zawng pawh a inang tawh lo. Tunlai miten **Ro hlu ka nei** tih te, **Kan fak zel dawn** tihte tui takin an sa tawh a. Min zah avanga hla min thlantir ve lahin, **Thianghlim Thianghlim** (KHB 1) te kan thlang ang nulh a. Thiam an tlem pharh tawh mai a. Han sak loh chi lah ni si lo. Min zah avangin a bu enim an lo phun ral ve a ni ngawt thin.

Ṭawngṭai rual an rawt lahin thupui thawh turah min ngai sa a. Kan thupui thawh ve te lah chu sawizawh kan tumna lamaha tum ber kan sawi bo ṭep a. Ṭawngṭai tawpna siamtu emaw tih tur khawpin kan bei rei fal a. Keimahni avanga KṬP-a tel nuam ti lo deuh te pawh an lo awm thei awm asin maw le.

Member nih chhungin phak tawk tawkin lo ṭang vein, theihtawp chhuah ve ṭhin mah ila. Lalpa leh mi dangte tan ṭhahnem harzia ka hre chhuak tlaikhawhnu ṭhin. Chuvangin KṬP member kan nih theih hun chhung hi a lo rei mang lo hle mai. Tuna member la ni mekte hian ṭhat lai leh vanglai hun rei loh turzia te, eng emaw hunah KṬP over-san mai tur nih inhre reengin, eng vang pawha KṬP member huang chhunga awm theih loh pawhin, member thar lo ni zel turte tan zir tur hnutchhiah ngei tumin ṭan hna la tak tak teh u. Kham lo leh ui chung a in chhuahsan hun hi a lo la thleng phut dawn a nia.

Ka lung hi a leng lawk a, a la leng dawn chauh niin ka hria. Tuna he thu ka ziah mek lai pawh ral khatah ṭhalai rualten ‘i hming a chuang tawh em?’ an ti ṭhup ṭhup a. Rimawi chi kim nen, camp chhuah hlim te a ni bawk a, an thawm mit delte hriat khawpin a ring. An bula kal ve lahin a ṭih khai ang chauh nihna chen kan nei a.

Kan vanglai leh ṭhat lai hian Lalpa tan kan tha leh zung, kan finna leh thiamnate hmang lo mah ila, thil dang atan kan hmang tho tho a. Lalpa rorel hunah sawi tur kan neih ve theih nan te, kan lo upat hunah pawh min tihlim fotu a nih theih nan member nih theih laiin beih vak mai tur a ni.

A tawp berah chuan, unaute u, ka duh vang leh thlan vang ni hauh loin, kan dan buin, “Nang zawng lo kiang tawh rawh, hnah hlui chu hnah tharin a thlak dawn e,’ min lo tih ve tak avangin, ngaïin, uiiin, tel ve chak mah ila, KṬP chu ka lo *bye bye* ve ta a ni. Lalpan KṬP malsawm zel rawh se ♦



*Hliamte chu a dam mai ṭhin a,  
ser erawh a dam thei ṭhin lo*

# Hruaitu kal chhuakte kam chhuak

## Revd. C. Lalsangliana

KṚP General Conference vawi 53-na Mamit khawpuih hlim taka kan hman zawh tak khan palaite leh thlengtute rilruah eng emaw tak chu a hnutchhihahin, eng kawngemaw tak chuan thu a sawi zui ngeiin a rinawm. Thlengtute inpekna leh inbuatsaihna ropuiziate, Zoram chhung leh pawn lama palai te, inhmelhriat ngai lem lo te pawh, Pathian faka hlim taka kan han zai ho dup dup mai te, thuchah kan dawn te, zaipawl chi hrang zai mawi leh thiam taka Pathian an fak thawm te, drama, special item mit leh beng titlai tak tak te, a... sawi kim sen loh khawpa Pathian hruaina kan dawn te leh a boruak hrim hrim mai kha theihngihl phal rual loh tur malsawmna hriat reng tlak a va ni tehlul em!

Mahni awmna khua leh branch theuhte tuang tak leh dam

takin kan thleng hlawm em ang chu maw? Kan awm khawhar chang leh mal ṭan riauva inhriat chang te awm mah se la, General Conference-a Pathian malsawmna kan dawn zozaite kha min tichak thartu lo ni se la. Ram chhunga sualna te, kan ram natna leh mi mala kan phurritten min delh rih zual chang te awm mah se, Lalpan ṭhalai sang tam rual a neih zozaite kha rilru-ah hre thar nawn fo ila, 'Min venpui rawh u' a tih ang ngeiin mahni hmun theuhah venpuitu rinawm nih zel i tum ang u.

Mahni lam ka inen a, kum 10 chuang zeta KṚP over tawh hnu, KṚP-te zinga tel leh theia min siam hi lawmawm ka ti a. Lalpa hnenah lawmthu ka sawi nawn leh a ni. Ṭhalaite nun zangkhai leh hlimawm, thothang ṭha leh inpe takte zinga awm zui zel hi chak hle

mah ila, kan kumin min nawr chhuak dawn ta si a. Ngai chung zelin mangṭha mai le tih a ṭul dawn ta chu a ni a. A va lunglenthlak em! Kum ral ta zawngte kha aw... koh kir leh theih ni se la... kan ti vawng vawng mai dawn a nih hi. Mitthlaa cham reng tur leh theihngihl phal rual loh thil hlu leh malsawmna in zinga ka tel ve chhung hian ka va dawng tam tehlul em! Pathian leh in zaa hnenah lawmthu ka sawi e. Hetianga KṬP in chhuahsan hun hi a lo la thleng ve hlawn dawn chu a ni a, thuchah tawi te tea han thlah che u ka duh a, in chhiar zui peih ang em le aw...?

**1** Vanglai hun hi a rei lo teh a nia aw. Kum 14–40 inkar hi rei thawkhat viauin lang mah se, pasal neih hun azirin nulate tan phei chuan a rei lo zual. A hun a lo thlen meuh chuan a ruka tuar veng veng tham a lo tling reng mai a. Koh kir leh siam ṭhat leh rual a ni lo. Chuvangin, vanglai hun te i hmang ṭha mawlh teh ang u.

**2** Kum 16 mi ka nihin KṬP General Conference hi ka kal ṭan a, zirna ṭul leh rawngbawlna avangin General Conference hman theih loh ṭum a tam a, kal kim ṭhap thei ni ila, a vanneihthlak hle dawn

a lo ni. General Conference kal kim thei te, kal tam theite hi an lo va awhawm tehlul em!

**3** Ram pum huap ṭhalai fuan khawm zingah kan kal chhan leh tih tur dik tak ngaihtuah lem lova lo theuleu kual ta te kan awm a nih chuan insiam ṭhat tum ila. Krista tan kan vanglai hunte hmang ṭha deuh deuh turin rilru thar i pu ang u.

**4** Sakhaw hunpui leh mipui tamna ber, Ganges luia Maha Kumb Mela Hindu ten an hmanaan mamawh tui, power supply, ei tur, *adt.* an buaipui ṭhin dante TV-ah te, a hmun ngeiah te kan hmu tawh ṭhin ngei ang a. Meghalaya sorkarin a ram mi leh sate inkhawmpui atana a buaipui nasat ṭhin dante pawh mit ngeiin kan lo hmu ve ṭhin a. Chutiang bawkin Mizoramah pawh hun hrang hrangah Mizoram sorkar leh a department hrang hrangte ṭan lak ṭhin dan kan hria a, a lawmawm tak zet a. Sorkarin a khua leh tui te, a mi leh sate a ngaihsak ṭhinnaah lawmthu kan sawi a ni. Tunah phei chuan General Conference thlengturu turte advance deuh taka puan chhuah a lo ni ta a. Mumal zawka inbuatsaih theih a beiseiawm ta a, a lawmawm hle



mai. Hnawhsaruma buai phili taka chet hi sulhnu a phua ilu ai in duh ang zana in peih a har a, rim taka thawk chung sia innawr chi-ai palh a awm thei a; hriat lawk a tha khawp mai.

**5** Palaiten thlen inte a tul ang leh theih ang tawka tanpui leh chetpui kan uar zel a tul a. Sum leh tha tam tak senga min thlengtute tihautak lo zawnga chet thiam a tha. Theih ang tawka lo inkhawl khawm a, an tan eng kawng emaw taka malsawmna ni turin inbuatsaih thin ang u.

**6** KṚP-te hi Kohhrana rawng-bawltu pawimawh, Upa, Pastor leh Kohhran Hmeichhe lama hruaitu la ni mai turte kan ni a. KṚP-a inhmang, KṚP bela chhum hminte hi an tlo-in an rin tlak bik thin a. Chutianga puitlinna kawnga min hruaitu Kohhran aiawhte leh ex-officio te hi sir khata lo tel ve satliah mai tur an ni lo a. Kohhranpui aiawh, an office hnain a ken tel avanga lo thu ve an ni a. Ex-Chairman, Ex-Moderator tih anga office chhuahsan mekte ang ni lovin office aiawha lo kal tih ang zawka ruat an ni.

Kohhran hnuaia mi kan ni a, Kohhran hawiher leh kalhmangte

kan zawh dik theihna tura min khalh ngiltu an ni a. Mizo nun dan mawikan zawm thin te, aia upate zah leh chawimawikan lo inzirtir thin te kha hetiang hunah hian kan lantir a tul a, experience/dai hriat ngah zawk leh KṚP-a lo inhmang tam zawkte an ni tih i hre reng ang u.

**7** Kohhran lian ber leh Kristian Thalai member ngah ber kan ni a. Zoram hmel timawitu, a tluk leh a din chhuah thuah pawh mawhpurtu kan ni thei tih hria ila. Ni tin khawsakna leh sum leh paiah kan dinhmun a inthlau thei hle a. Conference nghahna hmun azirin bial leh branch thenkhat chuan rorel palai kalna tur pawh an harsat thei hle a. Bial leh Branch aiawhte tel kim ngei tura inpeizawn dan awm thei se a duhawm ngawt mai.

A tawp berah chuan KṚP hi kan Kohhran hruaitu hmasaten Pathian rawn chung leh inkhawmpui remtiha thil tum leh innghahna fel tak neia an din a ni tih hre reng ila. Khawvela tui zawng inanghoten pawl leh society an din chawp ang mai ni lo, Bible-a innghahna fel tak neia an din a ni zawk. Kan hmaa mi huai kalte kha an ding nghet he

hmunah hian tih anga dinhmun leh innghahna fel tak nei a, kalhmang fel taka inhruai ṭhin kan ni tih i theihngihlh suh ang u. Chuvangin, hruaitu thar leh member thar duhawm takte hnena ngaih ngam taka mawhphurhna leh duhsakna hlan chungin- 'tunah hian Pathian leh a khawngaihna thu-ah ka kawltir a che u, chu chuan a siam lian thei che u a, mi rilru thianghlimte zingah ro chan a neihtir thei bawk a che u.' Lalpan vengin hruai zel che u rawh se.

---

### Upa P.C. Vanlalruata

PATHIAN awmpuina leh kaih-hruaina azarah CKṬP Committee member term ka lo hmang zo thei hi ka lawm hle. A tirin insit tak leh huphurh takin he chanvo hi ka ṭan a; nimahsela, Pathianin a tawk tein ro a rel a, mualphoin min siam lo a, a tana ka tih ve chhunte min hriatpui a, beithamin chhuanawm loh hle mah se, rimtuiah min pawm-sakin mal min sawmsak ve zel avangin Pathian hnenah lawmthu ka sawi tak meuh meuh a ni. Kristian Ṭhalaiten Pathian rawng kan bawl na kawngah taihmak chhuah zel thei ila, kan

rawngbawlnainawmzia a neih leh neih loh chut let fo thei ila a duhawm hle. Nakina kan inchhir loh nan kan vanglai hun hi fimkhur taka hmangin theihtawp chhuahin Lalpa rawng i bawl zel ang u.

---

### Pu Lalthlanga

PATHIAN khawngaihna avang chauhvin CKṬP Committee-ah term khat chhung khawngaih rawngbawlhna ka thawk zo ve ta mai hi Pathian chungah ka lawm takzet a ni. Hun rei lo te emaw ka tih chhungin KṬP rawngbawlhna chu chhuahsan a lo hun dawn ta mai hi mumang pawh a ang rum rumin ka hria. Kan rual u zawkten KṬP an chhuahsan dawna an thusawi ṭhinte ka hre chhuaka, an lunglen tur thu te, an ṭhat lai hun Pathian tana pe tawk an intih lohzia leh am taka Pathian tana hmang tura min chah laite mitthlaah a lo lang a, a hun lai khan ka chan turah ka dah ngai lo a; mahse, chu chu ka chan tur a lo ni ve reng si. Lung a leng dawn mang e. Kan ṭhat lai hun hi koh kir theih a ni dawn lo a, rei lo teah KṬP pawh chhuahsan a ṭul zel dawn. Lalpa tan am takin i hmang ang zel ang u.

Min hmangaihtu Lalpa Pathian, ka beisei loh leh rin phak loh CKTP Committee-a min thuttir vetu chungah lawnthu ka sawi tak meuh a ni.

---

### **Pu Lalhlengliana Pachuau**

KTP hi awm ta lo se la, khawiah nge ka awm ang a, eng nge ka tih ang a, eng mi nge ka nih ang tih ka ngaihtuah fo thin! Keia tan chuan KTP hi a va hlu leh zual em! Piang nawn leh thei ta pawh ni ila KTP-ah hian ka tel leh ngei ang... Krista rinna leh Amah anna kawnga thalaite hruaitu KTP vul zel rawh se.

---

### **Pu Robert Lalrempuia**

LEI HUNBI chhiar dana kum sul lo vei zel chuan KTP-a kan rawngbawlpui tam takte a her liampui leh ta mek a. Kan hriat angin Central KTP hruaitu eng emaw zat chuan an rawngbawl na tlâng an kâwm leh ta mek baw. A lung kuai zawnga thluk dawn chuan vanglai huna rawngbawl na mual liam tawh thlira indawm kun reng pawh a mawh lo ve.

Han thlir let hian KTP rawngbawl na hi Pathian khawngaihna a nihzia a Chiang hle mai.

A hun lai chuan hautak hle mah se, vanglai tha put laia Pathian rawng bawl hi a lo va hlu em!

*Kan lo inthen darh hian,  
Thinlung zawng a na ngei;  
Mahse, kan tum van nuamah  
khian,  
Intawh leh kan beisei.*

---

### **Upa Zothanmawia**

KRISTIANNA awmzia ka zirna, zir laibu-a awm lo zia k loh dan ka zirna, ka thin thate tia ka sawi thin min petu, Pathian ropuina ka hmuh thinna leh Pathian Thu ka puan chhuah thinna KTP hi ka tan chuan Pathian thilthlaw npek ropui panga thlang chhuak dawn ila ka telh ngei ka ring.

---

### **Pu Z. Lalmangaiha**

KTP inhruaina dan chuan KTP huang chhung a tangin min lo chawltir ve ta reng mai. Branch, Bial leh Central-a Pathian rawng ka lo bawl tawhnaten lung a tilengin dam chhunga hriat reng tur thil tam tak a lo awm ve ta reng mai. Ka tlin loh leh fel lohna hai dera a rawngbawl min phalsaktu Pathian hnenah lawmthu ka sawi a ni. KTP member nih hi a nuam a, a him a, a hlawkthlak em em a ni tih chu kum 40 chhung hian ka hre

chiang thawkhat hle mai. Presbyterian Kohhran member, kum 14-40 inkar i nih chuan KṬP-ah i theih ang tawkin inhmang la, tisa leh thlarauah Pathian malsawmna i dawng ngei ngei ang. Achhan chukan Pathian hi a lo ṭha em mai.

---

## T. Upa C. Lalmalsawma

ṬHALAI sing telin a huhova Pathian kan fak ho hi a ropui ka ti ṭhin. Mi tam tak khawvel thilin a len pil meklai hian khawvel hmaah Kristian Ṭhalai kan nihna hi lantir zel thei ila; kan fakna thawm hian member hlate pawh thleng phak zel se a duhawm hlein kan hria.

---

## Upa C. Vanlalvuana

PATHIAN leh KṬP member-te avanga Central KṬP hruaitute

zinga tel ve thei leh he chanvo hlu tak ka chelh chhuak thei hi hlu ka ti a, ka lawm hle mai. Ka tan hian KṬP hi a hlu em em a, ka nun min siamtu thil tam tak zingah a langsar hle a ni. Pathian leh a Kohhrante belh tlata KṬP zinga tel hlutzia hi a luhchilltuten an hre chiang ber a, an sim ngai lo, sawi nawmnahtute hi luhchill ve lo, pawnglang tak aṭanga thlirtu an ni chawk. Pathian hmangaih la, a Kohhranhote zingah tel rawh tiin ka ṭhalai puite ka ngen a che u.

---

## Pu Lalrinawma

KUMPUAN atan **memer hlate hnuh hnaih** tih hmangtute hian member tur kan khawn dan hi inen fiah ang u. Mamawhtu zawk kan thlauhthla ang tih a hlauhawm ta e



■ *Nu ber dawhkana lehkhia chi hrang hrang ching fela a buai em em laiin a fanu kum 5 mi chu a naute lem kiangah chuan hlim takin a lo awm ve a. A inpeih hnu chuan a fanu chu a malchunga ṭhu turin a sawm a. "Ka nu, ka hmangaih lutuk che, min koh avang khan ka lawm em em a ni." Duat taka pawm pah chuan, "Bawihte, tak tak maw? Min hmangaih avangin ka lawm e. Ka buai lai khan i naute lem nen khan in inkawm a, in hlim viau a ni lo'm ni?." "Hlim teh reng mai. Mahse, sawtiang hmangaih saw chu ka ning tlat. Min hmangaih let ve ngai si lo." "Chuwang chuan em ni min hmangaih?." "Ni tho ve; mahse chu aia chhan ṭha zawk chu a awm." "Chu chu eng nge ni?." Mit meng fiah kalha a nu en chung chuan, "Ka nu, han ring chhin teh. Ka tet laia hmangaih nachang che ka hriat loh chhung zawng pawha min lo hmangaih avang khan tunah hian ka hmangaih em em taroh che a ni."*

# KTP General Conference 2010

R. LALMALSAWMA (MSA)

**K**TP GENERAL Conference vawî 53-na, Mamit-a nei h chu tluang taka zawh a lo ni ta a; ðawngðaina chhángtu Pathianin min kaihhruaina a ropui hle. Fak tlák leh belh tlák a nihzia a takin kan hmuh chhunzawm zêl a, lawmthu i sawi ang u.

## ■ A thlengtu lam leh palaite

Kum 25 hnûa an thlen lehna a ni bawk a, Mamit khaw inbuatsaihna pawh a ropui hle mai. Thil pawimawhte inhrilh hriat nan website an siam te kha a remhriatthlak hle a; a hmuna kal ve thei lo leh chanchin thar la khawmtute tan hlei hlei inkhâwmpui láih leh a hnûah pawh a ðangkai tak zet.

A hmun thlen hlim a ðangin palaite min duat hle a; riahna chungchangah te, ei leh in chungchangah te (pandal-ah leh thlen in lam pawh), kawng engkimah kan nawm loh hlauin

min buaipui tluan chhuak zak a ni ber a, lawmthu kan sawi séng lo.

‘Mamit’ han tih hrim hrim hian mî hìpna riau a nei emaw tih mai tura palai khati zâta tam kan kal khâwm kha a ropui hle mai. A khaw thlen hmá kawng chho ulh leh tê te, a khaw lumzia te, tui harsat ðinziat sawi a nih ngun vei nèn, khâwmpui palai inziak lût mî 14,000 chuang fé kan la ni tho mai kha a lawmawm. A kalte chuan, tlân par par chu sawi loh, traffic jam vângam ramhnuaia motor za tél kan han ðing tlar pút mai te kha kan hlimpui a; kawrlum ha leh ha lo pawha inchei theihin boruak a nuam a; duh hun huna inbual theihna khawp tui a awm hian ‘tui a harsá’ kan ti ngai lo bawk a ni lo’ m ni kha?

## ■ Thupui leh thusawite

Thlarâu lam thupui pawimawh tak ‘**Tho la, i Pathian ko rawh**’ tih kan speaker Rev.

Zosangliana Colney hnên aṭanga chipchiar tak leh uluk taka zir chung a kan ngaihlthlâkte kha, a ngaihnawmna leh fiahna mai piah lamah Zoram pum ṭhaláite'n nunpui thei ila a va hlu dáwn êm! CKṬP Fin. Secy. Pu Zothanmawia'n '**Rimáwi hmanga Pathian Fakna Chungcháng'** a sawite khân tunlái Mizo ṭhaláite mai ni lo, nu leh pa leh Kohhran hruaitûte beng thleng ngêi se la, a ṭha lam zâwnga hma thar min lâktirtû ni thei sé a duhawm ngêi mai.

Synod Social Front Coordinator Dr. Robert S. Halliday-a hnên aṭanga '**Ṭhaláite leh Tùnlái Khawvêl (Media leh Sex)**' chungcháng kan ngaihlthlâk te kha, nasa taka an zirbing hnûa an thil hmuhchhuah, kan fimkhurna tûr leh hmá kan sâwnna tûr a ni a. Rawngbâwna huang kan zauh tharna tûr, hman nghâl mai theih *information* pawimawh tak tak a sawite kha KṬP member te'n kan ngaihven chhonzawm a, puanven kan sâwi chhìn a hun e!

Incheina uar tak leh *electronic gadget (mobile phones, computers, etc.)* neih leh hman kawnga hmanhlel, mahni *economy* leh mamawh mil áia mîte tih dàn leh neih ang el

rilru flat ṭhaláite hian, '**Incheina'** tih thupui, CKṬP Com. Member Pu Lalthlanga sawi te, '**Eizawmna leh Rawngbâwna'** tih thû, CKṬP Com. Member T.Upa Dr. C. Zarzolian a sawite leh '**Mobile Phone'** tih thupui hmanga CKṬP Com. Member vêk Pu H. Liantluanga sawite kha ngun taka ngaihtuahin zawm hrâm tum ila. Kan tih tûr ber Chanchin Ṭha puan darh a ni tih Rev. Vanlabela'n min hrilhte kha min tiharh thartûa hman a duhawm hlê.

#### ■ Programme dang

KṬP General Conference neih tawhah chuan a ṭan zàna palái inkhâwm kan ṭhathnem ber ṭum a ni hialin a rinawm. Inkhâwm dangah pawh kan pung chho zêl a, eizawmna thil leh ṭûl dang avànga a tûr aṭanga tel thei lo mi eng emaw zâtin mahni remchàn dàn angin minrawn zawm zêl bawk. Hlu êm êm chu – a ṭan zàn aṭanga zài boruak a ṭha kha a ni. Zài hruaitû (zái, musician leh hla hriltûte) inbuatsaihna a fakawm a; a thlengtu lam te, palái te leh he khâwmpui hlawhtlin theihna tûra nasa taka ṭawngtaia thlentûte dilna Pathianin a chháng a, Thlarâu Thianghlim awmpuina nèn hlim taka Amah kan fak thei kha a ropui takzet a ni.

Ṭum dang zawng zawng áiin kumin General Conference zet chu item a ṭha tláng hlêin a hriat a. Mit leh beng han tikham tak, lo ìp rúk chāwih chāwihna tūr a awm lêm lo kha a làwmawm. KṬP te' n hmá kan sâwnzia a takin kan hmu ṭhin a; chutih rualin hmasâwn zêl tūr kan nih erawh inhriat thar reng a pawimawh àwm e.

Mimal, huho leh záipáwl zái a ṭha tláng hlê a; an thāwm aṭang ringawt chuan thingtláng leh khawpui, *professional* leh 'nal lo pawh hriat hran an har. Tisâ leh Thlarāu lama *talent* nei ṭha tak takte' n tihtakzeta an chanvo rawn tihlawhtlinga, a rawng kan bàwl tlân Lalpa hnêna ropuina an rawn hlànte kha ava ropui êm!

### ■ Rawtna tlém

Sawisèl tūr zawn vàng hrim hrimna lam ni lovin, Conference apianga rilrúa awm reng ṭhin tlém i han tárlang tel lawk teh ang:

1) Inkhâwm/fellowship hruaitû leh chu inkhâwma chanvo pawimawh nei mi malte leh musician te deuh chauh emaw hi *stage* sîr tawn tawnah emaw, tléma *pivot* deuhin emaw ṭhuttir ṭhin ni tawh se a fuh zâwkang em? Kan hruaitû leh mikhual pawimawh tak takte

hian záipáwl, thusawitû leh chanvo dang rêng rêngte hi a-eng-a-mah, a nih tūr angin an hmu/hre vè thei ṭhin lo a. Hmun záu tak tūr kan tichêp zo vek ṭhin bawk si. Mipui ṭhutna lamah hian a tlar hma lamah an ṭhutna remcháng siamsak ni mai zâwk se (*Fellowship*-ah te pawh an ṭhut ṭhin ang hian).

2) *Stage* chanve hnunglam emaw hi puanzâr hmanga pindan theih ni tawh se. A bikin *fellowship*-a item nei tūr ṭhenkhat, inbuatsaih deuh ngai ang chîte tan, hun tam tak kan *save* thei ngêi ang. Hãutak lutuk lova tihdân a awm thoin a lang.

3) Hun hman dikah hian hmasâwn kan la ngai deuhin a hriat. *Programme* hriat sâ vekah chuan, a dawt leh inkhâwm/*fellowship* hun pawt hêk lo tūra inbuatsaih theih ni ṭhin se a duhawm. Tin, hruaitû ṭhenkhatte tih ang, hun hmangtûte (làmtuala mîte pawh) an ṭhuthmun an thlen kher nghâk lova *programme* lo kalpui zêl mai hi thil máwi lo a ni lêm lovin a hriat; chhunzawm zêl chí niin a lang.

4) A hmun hmáin a zir loh chu thu hran nì se, *pandal* chhunga awm tho si hian, *stage*-a

thil thleng hmu thei miah lovin a inkhâwm tluan thak theih zauh zauh a. *Projector* chu hmanh mah ila, eng emawtia kan thut dân tûr hi *design* fuh leh zual dân a awm theih a rinawm.

5) Chanvo hrang hrangte hi hmá taka inhriattír an nih thín ang áiin, inbuatsaihna thá tâwk lo nia lang a awm leh zauh thín. Tihhlawhtlin mai duh tâwk lovin, kan *member-puite'n* an hlâwkpuí ngêi theih nan tan lâk thar a duhawm hlê.

### ■ Tlipna

Ngaih dân a inang tak tak thei lo a, chutih rualin a nâwlpui thát tlânnâ tûr thil hi chu a awm fo. KTP General Conference te pawh hi, a sum hâutak leh khawi láí kil khat

emawa KTP lo taka chêtna a lo awm palh a nih pawhin, Pathian rawng kan bàwllhona kawnga min tichakthartû leh hmasâwnna min thlentû pawimawh tak a ni tih a la lang zêl a; Thlarâu Thianghlim awmpuina a taka kan chan zêl avàng hian kan chhünzawm zêl tûr ni pawhin a hriat.

Chutih rualin, thlen chin a tanga hmasâwn zêl tûr kan nihnaah, nun nghet leh rintlâk, khawvêl nawmsakna áia, a tûla nih chuan Pathian avànga chán ngam chung zêla kan thawh a ngái a ni tih kan leader kal chhuak Rev. C. Lalsangliana'n min hrilhthe kha nunpui zêl ila. Lal Isua krâws-a mahni theuh inkhéngbet chungin, nun thar nèn Member hláte hnûk hnâi tûrin tan i la thar theuh ang u♦



■ *Muslim pakhat hian intitheí takin Kristian pakhat hnenah, "Keini chuan Kristiante neih ve loh kan nei. Medina-a kan kal chuan, kuang pakhat kan hmu a; a chhungah Mohammed-a ruang a awm avangin ani chu khawvelah hian a lo awm ngei a ni tih a Chiang. Nangni ve chu Jerusalem-ah kal mah ula, thlan ruak bak hmuh tur in nei ve reng reng hlei nem," a ti a.*

*Kristian chuan, "I ti lawmarom hle mai, i thil sawi kha a dik a! Chu chuan chatuana kan danglamna a thlen thung. Thlan ruak kan hmuh avang tak chuan kan zuia hi tho leh Isua Krista a ni tih kan chian theih phah a ni," tiin a chhang hlah.*



## Taiwan thalaite lo kal



CT thalaite leh KṚP ten thuthlung kan neih angin KṚP General Conference leh EYEP programme hmang turin March 2-9, 2010 chhungin thalai panga (5) Rev. Zaidarhzauva hovin an lo kal a. Ni 2.3.2010-ah lo thlengin, tlaiah Rev. Lalzuithanga, Executive Secretary hovin CKṚP OB-ten zanriah an eipui a. Ni 3-4.3.2010 hian Synod rawngbawl na hmun hrang hrang tlawhpuiin zanah insem darhin Mission Vengthlang, Electric Veng leh Armed Veng Kohhranah inkhawmpui an ni.

Ni 5.3.2010-ah Conference-a tel ve turin Mamit-ah an lo kal a, hlim takin hun an hmanga. Inrinni zan Fellowship-ah item neiin, Pathianni chawhma inkhawmah chibai bukna sawitir an ni bawk. Ni 8.3.2010-ah Aizawlah let lehin, zanah Chanmari, Khatla leh Ramhlun South Branch KṚP inkhawmah an tel bawk. Hemi zan

hi Upa C. Vanlalvuana, Assistant Secretary, Upa Zothanmawia, Finance Secretary leh T. Upa Dr. C. Zarzoliana, Committee Member ten mikhualin an thleng a ni. Ni 9.3.2010 tlaiah Moderators' Dinner neihpuiin zan dar 7:00-ah Tourist Lodge, Chaltlangah an pualin special programme hmanpui a ni a, ni 10.3.2010-ah an hmun lam panin an haw ta a ni.

PCT thalaite lo kal hun hi General Conference kan hman lai a nih bawk avangin kum dang ang chuan kan kawm tam hman lo a; amaherawhchu, hemi hun hi lo kal se tia kan duhsakna avang a ni a, rawngbawl ho zel leh thawh ho zel pawh a chakawmin beiseina sang tak kan nei a ni. Anmahni lo mikhual leh dawnsawn thuah Synod Officers' Meeting (OM) lamin kawng min hawnsak thina, an chungah lawmthu kan sawi tak meuh meuh a ni ♦



## HRINGLANG TLÁNG

PA HAUSA TAK MAI PAKHAT hian fapa mal a nei a. An ram danah sipaiah a ñan a ngai tlat mai a, hreh tak chungin a kaltir ve a. Hun rei tak hnuah a lo haw ve tawh dawn emaw a tih laiin, tlangval pakhat a inah a rawn lut a, chu tlangval chuan, "I fapa kha a huaisen hle a ni; kei leh mi dang tam tak nun chhanhim nan a nun a chan phah a ni," tih pahin chu tlangval thi ta lem a ziah chu a pe a. "Lemziak thiam ka ni lo; mahse, lawmthu sawi nana ka theihtawpa ka ziah a ni e," a ti zui barok a.

Chu mi hausa chuan a fapa ngai reng rengin a dam chungin hun a hman zo a. A thih dawn hnaihah chuan a thian tha pakhat thu a chah a. A thih hnuah a in leh ro thil neih zawng zawngte bakah lemziak mawi tak tak a lo lak kharomte chu lilam vek turin a chah a ni. A fapa thi ta lem pawh chu lilam tel ngei turin a chah barok a.

Mi hausa pa ro thilte lilam hun a lo thleng ta a. Hmun hrang hrang atangin mi lian tak tak an rawn pung kharom a. In leh lo, huan leh ram tha tak takte bakah lemziak hlu tak takte chu chan ngei an tum ruh hlawm hle. Lilam an ñan ta a, lilamtu chuan, "A fapa lem hian bul kan ñan ang, eng zatin nge in ngam le?" a han ti a. Mipui an ngawih thuap laiin, mi hausa pa huan enkawlt thintu chuan, "Rs. 10-in ka ngam e," tiin a chhang a. Tumah dangin luahlan an tum lo; lemziak mawi tak a ni lo a, a hlutna awm reng an hre lo a ni. Lilamtuin, "Duhtu dang kan awm em?," tia a zawh chiam pawhin tumah rengin chhan an tum lo. Thil hlu dang lilam hun nghakhlelin an phi sek zawk hlawm a. A tawpah chuan huan enkawltu chuan fapa lemziak chu a chang ta a. Lilamtu chuan huan enkawltu putar hnena lemziak a pek pahin, "Vawiin kan thil lilam chu kan zo ta. Heng thil hlu tak tak neitu hian, a fapa ral rama thi ta kha a ngai em em a, a lem ringawt pawh hi a ngaihlu a ni. Chuwangin, a thurochhiahah chuan a fapa lemziak lei duhtu apiang chu, a ro thil dang zawng zawng pawh pe vek turin a ti a. Vawiinah hian he huan enkawltu hian thil dang zawng zawng pawh a nei vek dawn ta a ni," a ti a.

Kum 2000 chuang liam taah khan Lei leh Van Lalber chuan Kalvari-ah a fapa mal neihchhun a lo sun tawh a. A Fapa duhtu apiangte chu engkim pek tel vek tiam chungin vawiin thlengin, "Fapa duhtu kan awm em?" a la ti ta reng a ni ♦

# National Ecumenical Youth Assembly 2010

T. UPA DR. C. ZARZOLIANA



EYA 2010, NCCI Youth Commission buatsaih, January 6-10 chungkhan Kolkata, St. Thomas School-ah CKTP aṭangin Rev. C. Lalsangliana, Pu Lalrinawma, Upa C. Vanlalvuana, T. Upa C. Lalmalsawma, Pu Vanlal-finga, Pu Lalmuanawma, Pu H. Liantluanga, T. Upa Dr. C. Zarzo-liana te kan zu tel a. Presbyterian Church of India hnuaiia ṭhalai pawl, PYF palai anga kal kan ni a. PCI hnuaiia Synod dang ṭhalaite nen kan vaiin PYF hmingin mi 23 lai kan tel.

Kan Assembly thupui hi *Come, let's be friends* tih a ni a. Palai zawng zawng hi *volunteers*-te nen kan vaiin 800 vel kan ni. India ram pawn aṭangin palai ṭhahnem tawk tak, vun ngo leh ngo lote an rawn tela. *National* mai ni lovin *International Youth Assembly* a ni ber.

January ni 5 tlai dar 4 velah inkhawmpuina hmun hi kan thleng a. A thleng hmasa apiang min lo ziah luh pahin kan thla an lo la zel a. A tuk maiah *badge (Identity Card* ni nghal) mahni thlalak chuang min pe chhuak thei nghal vek mai a an fakawm hle. Palaite hi sa chi hrang hrang hming puin *group/family*-ah min ṭhen a, kan awmna *family* hming hi kan ID-ah ziah lan nghal a ni.

Assembly hawn inkhawm January ni 6 (Nilaini) zingah neih a ni a, Pathian fakna leh chibai bukna hla te sa hovin thuchah kan ngaihtlak hnuah, Assembly programme-a telte kan inpawm tlang a ni tih entir nan, thing ro, a ṭang ther fur maiah ribbon min sem lawk sa chu kan va suih hlawm a. Kei pawhin a sang lai berah ka va suih nghe nghe. Hawwna

inkhawm hi mahni ṭawng ṭheuha Lal ṭawngṭaina sawiin kan titawp a. Asia chhim lam ram hrang hrang Bangladesh, Sri Lanka, Nepal, Bhutan, India aṭanga Bishop lo kalten ṭhuro eng emaw zat chhuahin NEYA 2010 chu official-a hawn a ni.

Thingpui in chawlh kan neih zawhin Dr. Chunnakkara, Director, Commission of Churches on International Affairs-WCC chuan Assembly thupui keynote address a sawi a. Kan ṭhian kawm leh inrempui tur pathum Pathian (God), kan mihring puite (humanity) leh Pathian thil siamte (nature) an nih thu thiam takin a sawi hawng a. *Isua Kross-a a tuarna kha hmangaihna leh inremna vawrtawp entirna a ni a ti.*

Palaite group khata awm kan inhriat hran theih nan, **Noah's Ark** programmetawi te kan hmang a. Min lo ṭhen lawk sa tawh angin kan awmna *group/family* sa hram danin kan han inhram chhawk chu nuih a za duh hle. Group mumal taka kan inṭhen hian *workshop* nei tura insem darh pawh a tihawlsam phah hle.

January ni 7 (ningani) khan NCCI-in a lo ruahman angin kum

2014-a NCCI Centenary lo thleng tur lawm ṭanna hun hawn a ni a, PCI aṭanga palai kalten PYF Leader Rev. B.R. Kharnoir-a hla phuah, **Spirit of Oneness** tih chu zir chawpin zaipawl angin kan zai.

### ■ Hun hman dan tlangpui

Ruahman lawk ang chuan zing dar 8:30-ah Pathian biak inkhawm neiin, dar 9-ah Bible Study, kan thupui hawi neih ṭhin tur a ni a. Mahse 8:30-ah hian kan ṭan hman ngai lo a ni ber. Thingpui in chawlh kan neih zawhah dar 12-ah Assembly thupui ṭhen hrang hrangte chu resource person ten min zirtir ṭhin. Heng zingah hian Revd Chuauṭhuama lehkha zir laia a classmate, amah cho pha ve deuh ber, Dr. Evangiline-i pawh a tel ve. Kan resource person te an inbuatsiah ṭhain, an chanvo ṭheuh an hneh hlawm hle a, an hnen aṭangin zir tur tam tak a awm. Chawhnu lam chu workshop, rally leh sightseeing atan hun hman a ni ṭhin.

Programme kar lakah *greetings* sawi ṭhin a ni a. Kan Leader paw'n CKṬP hmingin palaite duhsakna chibai a hlan. KṬP aṭanga kalte min dintir a, KṬP

chungchang tawi fel takin a sawi bawk. Zan lamah concert a awm thin a, a zan khatnaah Hindi Gospel singer lar Vijay Benedict leh a fapa Reuel Benedict ten hun an rawn hmang a, a manhla hle. India rama zaithiam kan neih lang sar Usha Uthup bakah Shane Hyrapiet te pawhin concert an rawn nei. NEYA-in a ken tel pawimawh tak pakhat nia lang chu palai kal khawmte hlim taka hun hman tlan ho kha a ni.

#### ■ Workshop

January ni 7 (Ningani) leh ni 9 (Inrinni) chawhnu lamah workshop neih a ni a. Thupui hrang hrang heti angin then a ni : Faith and Politics, Climate Justice, Domestic Violence, Ecumenical Water Networking, HIV/AIDS, Sexuality and Transgender Issues, SEZ and Farmer Suicide, Employment, Trafficking and After Care, Ethnic conflicts, Corruption and transparency, leh a dangte a ni a. Group tin workshop-a kan thupui tur siam fel sa a awm avangin duhna hmun hmunah kan tel thei lo a, a vaia tel theih a chakawm hle. Group hrang hrangte hmun khatah intawk khawm lehin group report pek thin a ni a, a hlawkpuiawm viau.

#### ■ Friendship Rally

January ni 8 (Zirtawpni) chawhnu lamah chuan Friendship rally kan nei a, St. Thomas School atanga St. Paul's Cathedral thleng inzui thliah thliahin kawng kan zawh a. Justice, Friendship leh Environment venhimna, etc., lam hawi thuziak (placard) chi hrang kan keng a. A chang leh kan au rual bawka, boruak kan siamin mi mit pawh kan la hle. Kan leader pawh kea kal turin a lo in-fit viau mai.

#### ■ NEYA Kharna

Jan. ni 10 (Pathainni) zing dar 8-ah St. Pauls Cathedral-ah a duh apiangte inkhawm theih nan ruahmanna siam a ni a. Dar 11-ah St. Thomas School-ah kharna inkhawm neih a ni. NEYA programme kan hmuh dante sawi ho turin group hrang hrangah kan insiam a, kan group chu Upa C. Vanlalvuana Chairman-ah tanging keiin Secretary hna ka thawka. Kan group-in NEYA programme kan hmuh dan tlangpui sawina hun ka nei ve hlauh a. Ei leh in a that thu leh kan thupui zirte a hlawkpuiawm kan tih thu ka sawi bakah, kan punctual lovin programme tihdanglam tam lutuk bakah hlimhlawp lam kan uar lutuk deuha kan hriat thu te ka sawi.

Lawmthu sawina leh intlalna thute sawiin Organisers leh volunteers te chawimawi nan thilpek hlanna hun hman a ni a. Mizo nu chhuanawm tak Dr. Hrangthanchhungi, Secretary NCCI Commission on Minorities-in malsawm ṭawngṭaina a hlan zawhin India hnam hla **Jana gana mana** kan sa a, kan sak zawh rualin NEYA 2010 chu khar a ni zui ta a ni.

#### ■ Tlangkawmna

NEYA 2010-a telte hia tamber chu kum 30 bawr vel an ni a. Kum upa deuhte chu eng emaw zat tel ve mah se, an programme siam dan

kalphung leh chet vel danah kan aia naupang deuhte tel se keini aiin nuam an ti zawk hle awm mang e kan ti deuh. NCCI Officials zingah Dr. Chhungi a tel ve avangin min ngaihsak ṭha hle a, palai dangte nena khaikhinin kan thlenna pawh a nuam. NEYA 2010-a kan zu tel ve avang hian NCCI hotute nen kan inhmelhriat ṭhat phah hle a. KṭP General Conference Mamit-ah pawh mi pali (4) tel turin kan sawm a. Kan sawmte an hman kim thei lo chungin NCCI Vice-President, Youth changtu Angelios Michela leh Dr. Hrangthanchhungi te an rawn tel thei a a lawmawm hle ♦



## Kristian Thalai Editorial Board Member leh Synod Choir Director thar ruat

A hnuaia mi ang hian Central KṭP Committee chuan Kristian ṭhalai chanchinbu Editorial Board member leh Synod Choir Director thar a ruat a, Editorial Board thar hian May Issue aṭangin mawhphurhna an la ang:

Editor : Pu Lalmuanpuia, Assistant Co-ordinator  
 Jt. Editors : Pu R. Lalhmingthanga  
                   Tv. Vanlalhruaia  
                   Tv. V.L. Muanchhana  
                   Pu Lalramdina Ralte  
 Manager : Pu Lalnghinglova Hauzel

Mizoram Synod Choir Director thar atan Pu H. Liantluanga, Committee member chu ruat a ni bawk.

## Blood Test

**Z** Ka pu, tunah hian nula kum 21 mi ka ni a. Ngaih Zawng han tih mai piah lamah hmangaih em em mai ka nei a. Mahse, chu ka tlangval hmangaih chu tun hma lama damdawi lo ti tawh thin a ni. Ka hmangaih a, neih ngei pawh ka duh laiin eng emaw hri tha lote hi a lo vei ang tih ka hlau bawk si. Amah chuan inneih hi a rawt fo tawh a. **Blood test** ka'n sawi rik deuh leh, "Min va ringhlel awm ve, min hmangaih tawh loh vang a ni," a ti zel bawk si. Mi dang neih tur chuan ka phal bawk si lo. Ka pu, engtin nge ni ang?

– *Tei, Aizawl*

**Ch** Tunlaih chuan inneih hmaa blood test hi issue lian tak a ni tawh reng asin. Hriatthiam pawh a har viau a, kan pawm thiam dan chen a inang thei bawk si lo. Buaithlak angreng tak asin.

Chu aia buaithlak ta zawka ka hriat chu **hmangaihna** kan chhuanlam kual dan vel hi a ni!

Hmangaihna hi kan chhuanga, mi kar nan kan hmang a. Mi rilru hneh nan kan hmatheh a, mahni tlanghma hai nan kan chhuanlam thin. Kan duh zawng neih nan kan hmang a, kan duh loh zawng hnarna chhuanlamah kan hmang bawk a. '*Ka hmangaihna vang che hian e, hlimten i len chuan lawm zel ta nge'* tia an hmangaihte chu an hlim dawn phawt chuan innei ta lo mah se la lawm zel theite leh, '*I tel lova pialral kai chu, hmangaihna mak tak a ni dawn asin'* tia hmangaihte an tel ve dawn loh ai chuan vanram hial pawh hnualsuat duhte hian **hmangaih-na** an chhuanlam vek mai site hi hriatthiam a har.

Heti zawng hian i ngaihtuah teh ang. Thisen hi lo test-in hri tha lo pawh lo awm ta se i la hmangaih tho eng em? I la nei duh tho ang em? Lo nei duh dawn tho ta la eng nge tunah i hmanhmawh chung? Eng nge danglamna awm? Nei duh dawn ta lo ni la hmangaihna tia i vuah hi hmangaihna a tling zo em? I neih duh dawna i rin si

loh chuan a test duh i ring em? A tun hma nun leh tuna amaha thil awm thei zawng zawng kha i hmangaih tel lo anih si chuan **hmangaihna** a tling zo ang em? Hmangaih si loh chu engah nge i neih kher ang?

I bialpa hian hmangaih che se la thisen test hi eng vangin nge a duh loh ang? A hmangaih che a nih chuan i tana hlauhawm thei zawng zawng chu a chian vek tur a ni dawn lo'm ni? A hmangaih takin hri tha lo i kai ve a phal dawn em ni? A in-test duh loh a, i tana hlauhawm thei laka a intihfihlim si loh chuan chu chu hmangaihna a ni ang em? A hmangaih che a nih chuan i himna turin engkim a paltlang ngam zawk tur a ni dawn lo'm ni?

Archie comics-a ka chhiar pakhat chu, Archie-a khan Ve-

ronica-i hritlang hnap tui, hahchhiau thawt thawt reng mai lai kha a va kuah dawn a. Veronica i chuan, "Ka hritlang i kai ang," tiin a hmangaih Archie-a chu a damlo ve ang tih hlauin hmangaihna avangin a lo hnar a. Archie-a, hmangaihna ngah ta reng reng chuan a hmangaihna bawk chhuanlamin, "I love your germs (i natna hrik pawh ka hmangaih)," a'n ti leh ta tlat pek a!

Tunlaih hi chuan inneih hmaa thisen test hi a tha khawp mai. Tuman ngaih loh lamah ngai lo ila, hmangaih leh 'ngaih loh teh nan hmang lo ila, test zel a finthlak. Va test dun teh u, in pahnih khan!♦


(Dr. C. Lalhrekima'n **Thuruk 90** a ziah, KTP, Mission Veng Branch chhuah a tanga lak a ni. He leh khabu hi chhiar a manhla viau. Synod Bookroom-ah zawrh a ni. -Ed)



■ *Japan rama missionary hna a thawh tirhin Sam Boyle-a chuan a thusawi lehsak turin High School pakhata English zirtirtu hi a sawm a, ani pawh chuan Kristian ni hauh lo chungin a lo remti ve mai bawka.*

*A rawngbawlna chu tluang takin a kal dawn niin a hria a. Mahse, chawlhkar thumnaa a sermon-ah, "A tuk thumnaah chuan thihna hnehin a tho leh a..." tia a'n sawi ve leh chuan tawng lettu chuan makti deuhin a rawn en a, "Chutiang thu te chu tuma'n an awih chuang lo vang," a ti ta tlat mai a.*





# Hriatzauna

ROBERT LALREMPUIA

## Haiti ram tana CWM hmalakna

CWM Moderator Rev. Dr Prince Dibeela chuan lirnging na takin a sâwi Haiti ram tun din lehna tura CWM hmalakna thar a beiseiawm thu a sawi.

Dr Dibeela chuan Jamaica United Church leh Cayman Islands (UCJCI) te chu Haiti ram tana thlarau leh tisa lama chhawmdawl hna thawkturin hun rei tak chhung atan thawhpui turin a sawm.

Kumin April thla hian Moderator hian Caribbean ram a tlawh dawn a, hemi rual hian Haiti pawh hi a tlawh tura ruahman sa a ni. Dr Dibeela chuan, "Tun dinhmunah hian Haiti tlawh theih dan tur kan dap meka, thil thlen dan a hmun

ngeia en fiah kan tum a ni. Rei deuh mah se, Haiti tan hian theihtawp kan chhuah ang. CWM hian engtiang takin nge Haiti tan hian hma kan lak dawn sawi thei rih lo mah ila, kan theihna apiangah chhawmdawl hna nthawktute lawm takin kan thawhpui zel ang," a ti a ni.

Kumin January thlaa lirnging na takin Haiti a sâwi avanga chhiatna rapthlak tak a thlen hnu lawk khan CWM chuan thawhlawm thawhin Haiti ram tan hma a la nghal a, khawvel pum huapa kohhran ho hnenah a thlen nghal baw. CWM hruaituten hei hi duh tawklavin, Haiti ram tana theihtawp chhuah chhunzawm zel an la tum a ni ♦



■ *General Lon Wallace leh Bob Ingersoll-a te chuan Lal Isua hi a tho leh lo tih finfiah tumin an bei dun a. Mahse General Wallace chu a piangthar ta tlat mai, Lal Isua thawh leh zia tichiang turin 'BENHUR' thawnthu hi a ziak ta hlauh thung a ni.*

# Keimahni



■ March 4-7, 2010 chhung khan Mamit-ah KṬP General Conference wavi 53-na neih a ni a. CKṬP hruaitute an kal kim thei a, a law mawm hle. General Conference-ah hian palai kum dang zawng aiin an kal ṭha a, an chhinchhiah theih chinah mi 14,231 leh lehlanga kal mi 1,500 chuang lai an awm bawk. Pathianni zanah hi chuan mi 23,000 zet kan inkhawm a ni. Conference thlengtute inbuatsaihna a fakawmin mikhual an thleng zo hle a, Pathian hruaina zarah Conference hlawhtling tak kan hmang thei a ni.

Conference-ah hian ni 4, 2010 (Ningani) zan inkhawmah Synod Choir Music Video Album hmasa ber 'Pathian hmel' chu Upa Vanlalhuma, Synod Secretary-in a tlangzarh a. Kum 2010 KṬP Kumpulan 'Member hlate hnaih' chu Rev. Lalzuithanga, Executive Secretary, i/c KṬP-in Pathian hnena hlanin a hawng bawk.

March 6, 2010 (Inrinni) chawhnuah Mamit Kohhran Biak Inah rorel leh kum 2010-2012 hruaitu thlanna neih a ni a, rorel palai 884 niin kan kal ṭhat ber ṭum a ni. Ruah surin min tibuai lek lek nain a hun takah rorel leh hruaitu thar inthlan pawh kan zo thei a ni.

March ni 16, 2010 (Zirtawpni) tlai dar 3 khan hruaitu hlui leh tharten General Conference thlirletna leh charge inhlanna hun an hmang a, zanriah kil hovin dar 7 aṭangin Central KṬP Committee tharte thu pawimawh tak tak relin an meeting nghal a ni.

■ Kumin KṬP General Conference Hla Bu kha a tirah copy 30,000 chhuttir a ni a, Conference kan hman hma khan hralh zawh vek a ni a. Copy 10,000 chhut belhtir leh a ni a, tunah hian KṬP Office-ah tlem hralh tur a la awm a ni.

Kumpulan thupui kaihhraina bu pawh hralh zawh tawh a ni a, copy 1,500 chhut belh leh a ni a, KṬP Office-ah lei theihin a awm bawk. Kumpulan Bu hi Synod Website-ah download mai theih tura dah a ni bawk.

■ March 11, 2010-a Electric Veng Kohhran Biak Ina Kohhran Hmeichhe Rorel leh Buhfaitham Centenary lawmna inkhawmah Pu Lalmuanwma, Treasurer thar leh Dr. Samuel Vanlalhlanga, Committee Member te an palai.

## KRISTIAN ṬHALAI PAWL

### Thupui

Rawngbawl tura chhandam

### Thupui inngahna

Ephesi 2:10 Thil ṭha ti atán Krista Isuaah chuan siama awmin, ama kutchhuak kan ni si a, chu thil ṭha tih chu kan awmna tûrin Pathianin a buatsaih lâwk a ni.

### Thil tumte

1. Isua Krista rinna leh amah anna kawnga ṭhalaite hruai.
2. Kohhran kut ke ni tura ṭhalaite buatsaih.
3. Kohhran hnathawh tihpuitlin.
4. Krista Chanchin Ṭha puan darh

### KṬP CENTRAL COMMITTEE, 2008-2010

Leader	: Rev. K. Lalpiangthara	– 9436143955
Asst. Leader	: Pu Zohmingliana	– 9436159856
Gen. Secretary	: Upa Lalrinmuana	– 9436142643
Asst. Secretary	: T. Upa Dr. C. Zarzoliana	– 9436154486
Treasurer	: Pu Lalmuanawma	– 9436196819
Finance Secretary	: Pu Vanlalfinga	– 9862303241

### Committee Members

Pu H. Liantluanga	9436361167	Pu Lalthanmawia	9436141879
T. Upa Lallianmawia	9436192743	Pu Lalrohlua	9862573500
Dr. Samuel Vanlalhlanga	9436362173	Pu R. Lalhmingthanga	9436152362
Pu Zohmangaiha	9862018161	Tv. Vanlalhruaia	9436146913
Pu Lalhruaizela	9436156832	Pu Lalramdina Ralte	9436360865
Tv. V.L. Muanchhana	9862976771	Pu Saizamliana Sailo	9436148727
Pu Lalnginglova Hauzel	9436141979	Pu Lalmuanpuia	9436142398
T. Upa Zothangzuala Chhangte	9436152841		

### Ex-Officio members

Rev. C. Chawngliana	– Synod Moderator
Upa Vanlalhuma	– Synod Secretary (Sr.)
Rev. Lalzuithanga	– Executive Secretary, i/c KṬP

Postal Regn No. MZR/81/2009-2011  
RNT No. MIZMIZ/2009/29074

.....  
.....  
.....  
.....

To

*If undelivered, please return to –  
General Secretary  
Central KCP  
Synod Office  
Aizawl 796 001, Mizoram*



Printed & published by Lalrimuana on behalf of 'Krisian Thalai' Fellowship  
and printed at Synod Press, Mission Veng, Aizawl, Mizoram  
and published at Synod Office, Mission Veng, Aizawl, Mizoram  
Editor : C. Zosanghana  
Typeset by Samaritan Printer, Copies 24,000